



Aventuras en il guaud.



Visita en la chascharia da l'Alp Sez Ner.

FOTOS MAD

# Prender in «bogn» en il rumantsch

Emna intensiva da rumantsch per famiglias la stad e minicurs da lingua l'atun 2011

■ (LR) La Lia Rumantscha organisescha questa stad per la terza giada en seria ensemen cun in patronadi da geniturs in'emna intensiva da rumantsch per famiglias rumantschas e bilinguas che vivan ordaifer il territori rumantsch. Las famiglias duain avair la pussaivladad da far «bogn» en la lingua e cultura rumantscha durant l'emna da curs cun program accompagnant. En la chasa d'inscunter «Sentupada» a Vignogn vegn plinavant procurà per albiert e dunsena. Tgi che preferescha in program main extendì po visitar quest atun per l'emprima giada in minicurs da lingua che ha lieu a Maton.

La Lia Rumantscha ha en mira da promover l'integraziun linguistica e sociala da personas che na discurren betg rumantsch. Quai vala era per personas che vivan ordaifer il territori rumantsch

tradizional. Per quel motiv organisescha la Lia Rumantscha questa stad puspè in'emna intensiva da rumantsch per famiglias rumantschas e bilinguas che vivan ordaifer il territori rumantsch. Dals 25 fin ils 29 da fanadur 2011 ha lieu l'emna da curs a Vignogn/Lumnezia en la «Sentupada», l'antieriura chasa da scola che vegn nizzegiada oz sco center da sport e cultura. Il minicurs che vegn lantschà da nov ha lieu dals 21 fin ils 23 d'october 2011 a Maton/Muntogna da Schons e tracta medemamain a moda ludica la lingua e cultura rumantscha.

L'emna intensiva da rumantsch per famiglias duai porscher a geniturs ed uffants da tut las vegliadetgnas in program varià per che quels possian schlargiar lur competenzas linguisticas. L'ambient rumantsch duai gidar las famiglias a sa sentir puspè pli segiras en la lingua ruman-

tscha. Quai po vegnir cuntanschi a moda ludica en il curs da lingua intensiv. Il program accompagnant cumpiglia invistas en las activitads dals abitants dal vitg e dal conturn vischin. In'istorgia rumantscha accompogna las famiglias l'entira emna e serva sco ispiraziun per las differentas activitads. Sport e gieus, pitschnas represchentaziuns da teater, chant e saut, lavurs da zambregiar, aventuras en la natura ed il barat tranter ils participants cumpletteschan il program accompagnant. Il minicurs da l'atun a Maton – ina nova purschida – s'occupa da las medemas activitads sco l'emna intensiva, mo en furma pli cumprimida ed en in auter ambient.

Tar omaduas purschidas vegn discurrei rumantsch. Autras linguas vegnan integradas en las differentas activitads. Ina cuschina variada ed in accompagnament

pedagogic professional procuran per il bainstar da las famiglias.

Custs per l'emna intensiva da rumantsch resp. per il minicurs da lingua ed il program accompagnant Vignogn dals 25 fin ils 29 da fanadur 2011: 250 frs./persuna (200 francs per uffants sut 6 onns) en salas da durmir. Supplements pauschals da 100 francs per chombras da famiglia resp. 150 francs per chombras cun duscha e tualetta.

Maton dals 21 fin ils 23 d'october 2011: 150 frs./persuna (120 francs per uffants sut 6 onns) en salas da durmir. Supplements pauschals da 50 francs per chombras da famiglia resp. 75 francs per chombras dublas.

Ulteriuras infurmaziuns ed annunzias fin ils 31 da mars 2011: Lia Rumantscha, tel. 081 258 32 22, [www.liarumantscha.ch](http://www.liarumantscha.ch)